

BOSNA I HERCEGOVINA
FEDERACIJA BOSNE I HERCEGOVINE
UNSKO-SANSKI KANTON
GRAD BIHAĆ
GRADONAČELNIK

Broj: 04/1-19-5-13/21

Bihać, 25.03.2021. godine

Na osnovu člana 183. stav (2) Poslovnika Gradskog vijeća (“Službeni glasnik Grada Bihaća”, br: 03/16, 4/20), Gradonačelnik u svojstvu predlagača propisa i drugih akata

O d r e đ u j e

Izvjestioca: Elviru Hadžić, šefa Odsjeka za komunalne djelatnosti na sjednici Gradskog vijeća i radnim tijelima po prijedlogu tačke dnevnog reda:

-Prijedlog Odluke o uslovima i načinu korištenja plovila na rijeci Uni

Gradonačelnik
Šuhret Fazlić

BOSNA I HERCEGOVINA
FEDERACIJA BOSNE I HERCEGOVINE
UNSKO-SANSKI KANTON
GRAD BIHAĆ
GRADONAČELNIK

Služba za strateško planiranje, upravljanje projektima,
komunalne djelatnosti, vode i zaštitu okoliša

Broj: 04/1-19-5-13/21

Bihać, 24.03.2021. godine

Na osnovu člana 52. tačka a) Statuta Grada Bihaća ("Službeni glasnik Grada Bihaća" br: 13/15 i 13/18), dostavljam vam Prijedlog Odluke o uslovima i načinu korištenja plovila na rijeci Uni, na razmatranje radi donošenja.

O b r a z l o ž e n j e

Pravni osnov za donošenje:

Pravni osnov za donošenje Prijedloga Odluke o uslovima i načinu korištenja plovila na rijeci Uni, sadržan je u:

-članu 6. Zakona o unutrašnjoj i pomorskoj plovidbi („Službene novine Federacije BiH“, broj: 73/05), kojim je, između ostalog, propisano da se obala i priobalni pojas na plovnim putevima mogu koristiti u skladu sa odlukom nadležnog organa u Federaciji BiH, odnosno kantonu, općini uz prethodno pribavljenu saglasnost nadležne kapetanije i u skladu sa zakonom kojim se određuju: način, uslovi i vrijeme korištenja, područje obale i priobalnog pojasa koji se daju na korištenje i ovlaštenja korisnika,

-članu 12. Zakona o lokalnoj samoupravi Unsko-sanskog kantona („Službeni glasnik USK-a“, br: 8/11), kojim je propisano da u vlastite nadležnosti jedinice lokalne samouprave posebno spadaju: utvrđivanje i provođenje politike uređenja prostora i zaštite čovjekove okoline (alineja č), te donošenje propisa o porezima, naknadama, doprinosima i taksama iz nadležnosti jedinice lokalne samouprave (alineja nj), i

-članu 35. alineji c) Statuta Grada Bihaća ("Službeni glasnik Grada Bihaća", br: 13/15 i 13/18), kojim je propisano da Gradsko vijeće donosi odluke i druge opće akte kojima uređuje pitanja iz samoupravnog djelokruga Grada i daje njihovo tumačenje, i alineji i) kojom je propisano da Gradsko vijeće donosi propise o porezima, taksama, naknadama i drugim prihodima od interesa za Grad.

Razlozi donošenja:

Zaključkom Gradskog vijeća, broj: 01-21864/21 od 19.03.2021. godine prijedlog Odluke o uslovima i načinu korištenja plovila na rijeci Uni vraćen je predlagачu na dopunu, te je imenovana radna grupa za razmatranje primjedbi iznešenih na sjednici Gradskog vijeća, a koje se odnose na odgodu primjene odredaba o plaćanju taksi, površinu plutajućeg objekta i plaćanje taksi na rafting čamce.

Postupajući po navedenom Zaključku, na sastanku radne grupe održanom dana 23.03.2021. godine razmatrane su primjedbe gradskih vijećnika, te je o istima zauzet slijedeći stav, koji je prihvaćen i od strane predlagачa:

1) da se u članu 7. izvrši dopuna tačke e) na način da se dodaju riječi „odnosno list očevidnosti za plutajući objekat“ i tačke f) na način da se dodaju riječi „za plutajuće objekte postavljene u obuhvatu JP Nacionalnog parka „UNA“,

2) da se u članu 12. izmijeni maksimalna površina plutajućeg objekta, na način da se umjesto dosadašnjih 30m², propiše 100m² kao maksimalna površina plutajućeg objekta, što će u konačnici ovisiti o zakupljenom javnom dobru, odnosno skici iskolčenja koja je sastavni dio ugovora o ograničenom pravu korištenja javnog vodnog dobra,

3) da se član 13. dopuni na način da se jasno propiše da samo čamci za sezonske ugostiteljske potrebe imaju obavezu utvrđivanja osposobljenosti čamaca za plovidbu, obzirom da prema članu 50. Zakona o unutrašnjoj i pomorskoj plovidbi rafting čamci mogu ploviti na divljim vodama, ako su dobili propisanu licencu od nadležne kapetanije i ako posjeduju registraciju korisnika, odnosno vlasnika rafting čamca radi čega nije osnovano ponovno propisivanje ove obaveze za rafting čamce, kao i da se ovaj član dopuni novim stavom (5) kojim bi se propisalo da čamci za sezonske ugostiteljske potrebe svojim izgledom treba da asociraju na tradicionalne unske lađe, a materijali od kojih su izgrađeni ne smiju zagađivati okoliš/vodotok,

4) da se dopuni član 14. stav (2), na način da se iz zabrane korištenja motora sa pogonskim gorivom izuzmu čamci za potrebe takmičenja kajak-kanu klubova, ronilačke službe, za spašavanje ljudi, imovine i dobara i za potrebe provođenja policijskih i vojnih zadataka,

5) da se izmijeni član 16., na način da se iz teksta briše „tačka c)“, čime bi se u konačnici brisala obaveza plaćanja takse za čamce za turističke potrebe, odnosno rafting čamce obzirom da se za gornji tok rijeke Une plaća taksa Nacionalnom parku, dok za donji tok rijeke Une još uvijek ne postoji mogućnost naplate. Naime, tek po osiguranju uslova za postavljanje određene naplatne tačke na kojoj bi se naplaćivao svaki pojedinačni ulazak čamca u rijeku, stvorila bi se mogućnost naplate za rafting čamce, radi čega paušalna naplata nije niti osnovana,

6) da se dopuni član 18., odnosno da se u stavu (1) dodaju i sportska udruženja,

7) da se dopuni član 23., odnosno da primjena Odluke bude počev od 01.01.2022. godine. Naime, pri predlaganju odgode u primjeni odluke radna grupa je cijenila prvenstveno izuzetno tešku finansijsku situaciju uzrokovanu pandemijom korona virusa, zatim činjenicu da se ova oblast po prvi put uređuje na području grada Bihaća, kao i da se u postupku traži obimnija dokumentacija, radi čega smatra da se zaineresiranoj javnosti, odnosno poslovnim subjektima treba ostaviti duži period za upoznavanje sa odredbama Odluke.

Potrebna finansijska sredstva:

Za provođenje ove Odluke nije potrebno obezbjediti finansijska sredstva u Budžetu Grada Bihaća.

Imajući u vidu gore navedeno, predlaže se Gradskom vijeću Bihać da usvoji Prijedlog Odluke o uslovima i načinu korištenja plovila na rijeci Uni, kao u predloženom tekstu.

Prilog:

1. Prijedlog Odluke o uslovima i načinu korištenja plovila na rijeci Uni

Obradivač:
Elvira Hadžić

Gradonačelnik
Šuhret Fazlić

PRIJEDLOG

Na osnovu člana 6. Zakona o unutrašnjoj i pomorskoj plovidbi („Službene novine Federacije BiH“, broj: 73/05), člana 12. alineja č) i nj) Zakona o lokalnoj samoupravi Unsko-sanskog kantona („Službeni glasnik USK-a“, br: 8/11), te člana 35. alineja c) i i) Statuta Grada Bihaća („Službeni glasnik Grada Bihaća“, br: 13/15 i 13/18) Gradsko vijeće Bihać na _____sjednici održanoj dana _____2021. godine donijelo je:

ODLUKU

o uslovima i načinu korištenja plovila na rijeci Uni

DIO PRVI-OPĆE ODREDBE

Član 1.

(Predmet odluke)

Ovom Odlukom određuju se uslovi i način korištenja plovila na rijeci Uni, vrste i broj plovila koja se mogu koristiti, visina takse za korištenje plovila, nadzor nad provođenjem Odluke, te kaznene odredbe za nepoštivanje odredaba Odluke.

Član 2.

(Značenje pojmova)

Pojedini izrazi upotrebljeni u ovoj Odluci imaju sljedeća značenja:

- a) „plovilo“ – pod plovilom, u smislu ove Odluke, podrazumijeva se plovni objekt prikladan za plovidbu i plutanje na vodi, odnosno plutajući objekat, čamac, kao i ostala plovila koja se koriste u rekreativne i komercijalne svrhe (pedaline, bicikla na vodi, itd.),
- b) „plutajući objekat za pružanje ugostiteljskih usluga“ je naprava na vodi, registrovana za obavljanje ugostiteljske djelatnosti, stalno privezana ili usidrena, i koja nije osposobljena za plovidbu,
- c) „čamac“ unutrašnje plovidbe je plovilo namijenjeno za plovidbu na rijekama, jezerima i kanalima, dužine do 15m i širine do 3m, ili čija je istisnina manja od 15 tona,
- d) „ugostiteljska djelatnost“ je djelatnost koju može obavljati pravno i fizičko lice koje je registrirano za obavljanje ugostiteljske djelatnosti i uz ispunjavanje uvjeta propisanih Zakonom o ugostiteljskoj djelatnosti FBiH i propisima donesenim na osnovu njega,
- e) „ugostiteljske usluge na plovnom objektu“- ugostitelj-fizičko lice može pružati usluge prehrane, pića i napitaka na svom plovnom objektu za najviše 20 gostiju istodobno.

Član 3.

(Obveznik takse)

Obveznici plaćanja takse za korištenje plovila na rijeci Uni su sva fizička i pravna lica koja su vlasnici registrovanih plovila i koja obavljaju registrovanu ugostiteljsku djelatnost.

Član 4.

(Prihodi od taksa)

Prihodi od taksa uplaćuju se na račun javnih prihoda Budžeta Grada Bihaća putem poslovne banke i bit će namjenski utrošeni za čišćenje i uređenje obale rijeke Une.

DIO DRUGI-PLUTAJUĆI OBJEKTI

Član 5.

(Uslovi za postavljanje)

Ugostitelji, vlasnici plutajućih objekata za pružanje ugostiteljskih usluga mogu postavljati plutajuće objekte na rijeci Uni pod uslovom da:

- a) imaju registrirani ugostiteljski objekat koji ima direktan pristup na rijeku Unu,
- b) je osposobljenost plutajućeg objekta za plutanje utvrđena u skladu sa Pravilnikom o načinu utvrđivanja sposobnosti za plutanje plutajućeg objekta na unutrašnjem i pomorskom plovnom putu („Sl. novine FBiH“, broj: 13/07),
- c) ispunjavaju opće uslove za pružanje ugostiteljskih usluga utvrđene Pravilnikom o pružanju ugostiteljskih usluga u pokretnim objektima („Sl. novine FBiH“, br. 40/10).
- d) imaju zaključen Ugovor o ograničenom pravu korištenja javnog vodnog dobra zaključen sa „Agencijom za vodno područje rijeke Save“ Sarajevo (u daljem tekstu: Agencija),
- e) imaju saglasnost NP „UNA“ ukoliko se plutajući objekat postavlja unutar područja Nacionalnog parka „UNA“.

Član 6.

(Rješenje)

(1) Postavljanje plutajućeg objekta vrši se na osnovu rješenja koje donosi Gradonačelnik, putem Službe za strateško planiranje, upravljanje projektima, komunalne djelatnosti, vode i zaštite okoliša, a isto se donosi na osnovu zahtjeva stranke i po službenoj dužnosti.

(2) Rješenjem kojim se odobrava postavljanje plutajućeg objekta određuje se ugostitelj kojem se odobrava postavljanje plutajućeg objekta, detaljna oznaka i veličina lokacije čije se korištenje odobrava, namjena i vrsta plutajućeg objekta, vremenski period na koji se odobrava postavljanje plutajućeg objekta, visina takse i drugi elementi.

Član 7.

(Dokumentacija uz zahtjev za postavljanje plutajućeg objekta)

Uz zahtjev za odobravanje postavljanja plutajućeg objekta, ugostitelj je dužan priložiti:

- a) ugovor o ograničenom pravu korištenja javnog vodnog dobra zaključen sa Agencijom.
- b) tehničku dokumentaciju koja treba da sadrži: tehnički opis sa osnovnim podacima o namjeni i veličini objekta, vrsti materijala, načinu obezbjeđenja objekta na vodi, prilaza objektu i načinu vezivanja objekta, te grafički prilog osnove objekta, profil i izgled objekta sa obale i sa vode
- c) rješenje nadležnog organa za obavljanje djelatnosti za koju traži postavljanje plutajućeg objekta,
- d) akt o registraciji firme,
- e) dokaz o osposobljenosti objekta za plutanje na rijeci Uni, izdan od strane Federalnog ministarstva prometa i komunikacija Mostar, odnosno list očevidnosti za plutajući objekat,
- f) saglasnost JP Nacionalni park „UNA“ d.o.o. Bihać, za plutajuće objekte postavljene u obuhvatu Nacionalnog parka „UNA“.

Član 8.

(Period korištenja)

(1) Postavljanje plutajućeg objekta može se odobriti na period do 1 (jedne) godine, a najduže na period definisan Ugovorom o ograničenom pravu korištenja javnog vodnog dobra, zaključenim između ugostitelja, vlasnika plutajućeg objekta i Agencije.

(2) Pravnom i fizičkom licu koje nema neizmirenih obaveza prema Gradu Bihaću na ime takse po prethodno izdanim rješenjima, može se odobriti nastavak korištenja postavljenog plutajućeg objekta, po zahtjevu koji se podnosi Službi za strateško planiranje, upravljanje projektima, komunalne djelatnosti, vode i zaštitu okoliša najkasnije 30 dana prije isteka perioda utvrđenog prethodnim rješenjem.

Član 9.

(Uklanjanje)

Plutajući objekti postavljeni bez rješenja Gradonačelnika ili suprotno od uvjeta propisanih ovom Odlukom, odmah će se ukloniti.

Član 10.

(Zone u kojima je moguće postavljanje plutajućih objekata)

Zone u kojima se mogu postavljati plutajući objekti na rijeci Uni, obuhvataju:

- a) I zona, obuhvata 1000 metara, uzvodno i nizvodno od mostova, slapova, geomorfološki karakterističnih zona, sedrenih tvorevina i slično,
- b) II zona, obuhvata naseljena mjesta uz vodotok,
- c) III zona, obuhvata ostali tok vodotoka.

Član 11.

(Lokacije gdje nije dozvoljeno postavljanje plutajućih objekata)

(1) Postavljanje plutajućih objekata nije dozvoljeno:

- a) u nultoj zoni koja obuhvata granice užeg urbanog područja grada Bihaća shodno Urbanističkom planu grada Bihaća,
- b) na slapovima i sedrenim tvorevinama rijeke Une, u obuhvatu 200 metara uzvodno i nizvodno od slapova (mjereći osovinom rijeke Une),
- c) na lokacijama gdje je rijeka Una izrazito uskog toka (< 30,0 m),
- d) u posebno zaštićenim prostorima, unutar zone nukleusa, unutar zone temeljnih prirodnih vrijednosti, unutar zone najstrože zaštite i unutar zone vrlo stroge zaštite, definiranih Prostornim planom područja posebnih obilježja od značaja za Federaciju BiH „ Sliv rijeke Une“ za period od 20 godina,

(2) Zabranjeno je privezivanje plutajućeg objekta za drvo, kamen, klupu ili neki sličan predmet, kao i oštećivanje obala i izvođenje radova koji će narušiti izgled obale rijeke.

Član 12.

(Površina i opis plutajućih objekata)

(1) Maksimalna površina plutajućih objekata za pružanje ugostiteljskih usluga koji se postavljaju na rijeci Uni iznosi 100 m².

(2) Podna obloga plutajućih objekata treba biti izrađena od laganih materijala, prirodnog izgleda drveta smeđe/crne/boje ili stakla, (zabranjena upotreba pleksiglasa).

(3) Stolice i stolovi trebaju biti od prirodnih materijala ili imitacija istih, jednoobrazni.

(4) Ograde oko plutajućih objekata mogu biti metalne konstrukcije (transparentne, prozirne u tamnoj boji, crna/tamno smeđa) ili staklo (zabranjen sjajni inox).

(5) Plutajući objekat može se natkriti konstrukcijom koja će biti identična konstrukciji ograde, iste materijalizacije, transparentna, prozirna, šuplja sa tekstilnim pokrivačem u bež ili bijeloj boji, bez natpisa.

(6) Svi materijali koji se upotrebljavaju za izradu plutajućeg objekta moraju imati certifikat da ne zagađuju okoliš/vodotok.

DIO TREĆI-ČAMCI

Član 13.

(Čamci)

(1) Čamci koji plove rijekom Unom mogu biti:

- a) čamci za osobne potrebe (unska lađa),
- b) čamci za sezonske ugostiteljske potrebe,
- c) čamci za turističke i sportske aktivnosti.

(2) Čamci za sezonske ugostiteljske potrebe podliježu utvrđivanju osposobljenosti čamac za plovidbu i upisu u registar čamac kod Kapetanije unutrašnje plovidbe Ostrožac, Općina Jablanica.

(3) Broj čamac navedenih u stavu (1) tačka b) ovog člana je ograničen veličinom zona na rijeci Uni, utvrđenih u članu 10. stav (2) ove Odluke.

(4) Na rijeci Uni dozvoljen je pogon čamac na veslo i elektro-pogon (akumulatori).

(5) Čamci za sezonske ugostiteljske potrebe svojim izgledom treba da asociraju na tradicionalne unske lađe, a materijali od kojih su izgrađeni ne smiju zagađivati okoliš/vodotok.

Član 14.

(Zabrane)

(1) Na rijeci Uni zabranjena je upotreba čamac koji klize na vodi (gliseri, ski skuteri).

(2) Za plovidbu čamac na rijeci Uni zabranjeno je upotrebljavati motore sa pogonskim gorivom, izuzev za potrebe takmičenja kajak-kanu klubova, ronilačke službe, za spašavanje ljudi, imovine i dobara i za potrebe provođenja policijskih i vojnih zadataka.

(3) Na rijeci Uni zabranjena je upotreba čamac dužine preko 8 metara i širine preko 3 metra.

(4) Na rijeci Uni zabranjena je upotreba velikih čamac (preko 5 metara) u blizini uređenih kupališta i tradicionalnih kupališta gdje se okuplja veći broj ljudi.

(5) Zabranjena je upotreba čamac za plovidbu unutar područja Nacionalnog parka „UNA“ bez prethodno pribavljene saglasnosti JP Nacionalni park „UNA“ d.o.o. Bihać.

DIO ČETVRTI-TAKSE

Član 15.

(Visina takse za plutajuće objekte)

(1) Ugostitelji, vlasnici plutajućih objekata plaćaju taksu za korištenje plutajućih objekata na rijeci Uni, koja po plutajućem objektu/godišnje, iznosi:

a) I zona	500,00 KM
b) II zona	400,00 KM
c) III zona	300,00 KM

Član 16.

(Visina takse za čamce)

Ugostitelji i vlasnici čamaca iz člana 13. stav (1) tačka b) ove Odluke plaćaju godišnju taksu za korištenje čamaca na rijeci Uni, koja po jednom čamcu/godišnje, iznosi:

a) I zona	250,00 KM
b) II zona	200,00 KM
c) III zona	150,00 KM

Član 17.

(Visina takse za ostala plovila)

Za plovne objekte za koje nije potrebna registracija, a koji se koriste za komercijalne svrhe, po jednom plovilu plaća se godišnja taksa u iznosu od 100,00 KM (pedaline, bicikli na vodi itd).

Član 18.

(Oslobađanja)

Taksa za korištenje plovila neće se naplaćivati u slijedećim slučajevima:

- a) ako su vlasnici čamaca udruženja građana (ribolovna, ekološka, sportska itd.), koja će čamce koristiti u sportske i rekreativne svrhe,
- b) ako su vlasnici čamaca fizička lica koja čamce (unske lađe) koriste za vlastite potrebe,
- c) ako su čamci u funkciji spašavanja ljudi, imovine i dobara ili u funkciji provođenja policijskih i vojnih zadataka i obrane.

DIO PETI-INSPEKCIJSKI NADZOR

Član 19.

(Inspekcijski nadzor)

Inspekcijski nadzor nad provođenjem odredaba ove Odluke vrše gradski vodni i komunalni inspektor.

Član 20.

(Ovlaštenja inspektora)

(1) U vršenju inspekcijskog nadzora, gradski vodni/komunalni inspektor je ovlašten da nadzire provođenje ove Odluke te da, u saradnji sa Policijskom upravom Bihać, naredi uklanjanje svih plovila koja se na rijeci Uni koriste suprotno odredbama ove Odluke.

(2) Na osnovu rješenja gradskog vodnog/komunalnog inspektora sva protupravno postavljena (vezana) plovila moraju se ukloniti u roku od osam dana.

(3) Ako vlasnik plovila ne izvrši uklanjanje plovila u roku određenom rješenjem gradskog vodnog/komunalnog inspektora, plovilo će ukloniti gradska inspekcija o trošku vlasnika plovila, uključujući troškove premještanja i čuvanja.

(4) Uklonjena plovila vlasnici su dužni preuzeti u roku od 30 dana uz namirenje nastalih troškova, a u suprotnom uklonjena plovila će se prodati na javnoj licitaciji radi podmirenja troškova.

DIO PETI – KAZNENE ODREDBE

Član 21.

(Prekršaji)

Novčanom kaznom u iznosu od 1.000,00 KM do 3.000, 00 KM kaznit će se ugostitelj, ako postupi suprotno odredbama člana 5., 6., 7. i 14. ove Odluke.

Član 22.

(Prekršaji)

Novčanom kaznom u iznosu od 3.000,00 KM do 9.000,00 KM kaznit će se ugostitelj, ako postupi suprotno odredbama člana 11. ove Odluke.

DIO ŠESTI- ZAVRŠNE ODREDBE

Član 23.

(Stupanje na snagu)

Ova Odluka stupa na snagu osmog dana od dana objavljivanja u „ Službenom glasniku Grada Bihaća“, a primjenjivat će se počev od 01.01.2022. godine.

Gradsko vijeće

Broj: _____/21

Bihać, _____2021. godine

Predsjedavajući Gradskog vijeća

Zulfikar Handukić